



კონკურსი

„2016 წლის საუკეთესო სასურსათო საწარმო“

ევროპის ფონდი იწვევს საქართველოში სურსათის სფეროში მომუშავე საწარმოებს კონკურსში მონაწილეობის მისაღებად.

ევროპის ფონდის შესახებ

ევროპის ფონდის მისიაა პრაქტიკული პროგრამების განხორციელების მეშვეობით საშუალება მისცეს მოქალაქეებს ზეგავლენა მოახდინონ ცვლილებებზე სოციალური სამართლიანობისა და ეკონომიკური აღმშენებლობისათვის, რათა გაუმჯობესდეს მათი და მათ გარშემომყოფთა ცხოვრება. მიზნობრივი პროგრამების მხარდაჭერის და საგრანტო კონკურსების გზით, ევროპის ფონდი მიმდინარე სოციალურ, ეკონომიკურ და პოლიტიკურ მოვლენებში მოქალაქეთა აქტიურ თანამონაწილეობას უზრუნველყოფს, რაც ადგილობრივ, რეგიონულ თუ ეროვნულ დონეზე პოზიტიურ ცვლილებებს უწყობს ხელს. ამჟამად ევროპის ფონდი შემდეგ პროგრამებს ახორციელებს: თანამონაწილეობა და მონიტორინგი ცვლილებებისთვის, ახალგაზრდული ინტეგრაცია, ევროპული ინტეგრაცია, სოციალური მეწარმეობის განვითარება და ღია კარის საგრანტო პროგრამა. ფონდის დონორებისა და პარტნიორების რიცხვში არიან ევროკავშირის დელეგაცია საქართველოში (EU), შვედეთის საერთაშორისო თანამშრომლობისა და განვითარების სააგენტო (Sida) და ა.შ. დამატებითი ინფორმაციისათვის ევროპის ფონდის შესახებ შეგიძლიათ ეწვიოთ ვებგვერდს www.epfound.ge

ევროკავშირთან დაახლოების გამჭვირვალე პროცესი: სანიტარული და ფიტოსანიტარული პოლიტიკა საქართველოში პროექტის შესახებ

პროექტის მეშვეობით ფონდი ხელს უწყობს საქართველოს სურსათის უვნებლობისა და მომხმარებლის უფლებების დაცვის პოლიტიკისა და კანონმდებლობის დაახლოებას ევროკავშირის სტანდარტებთან, მათ შორის, რეფორმის პროცესში სამოქალაქო მონაწილეობის გააქტიურების კუთხით. ამ ამოცანების მისაღწევად, ფონდი ხელს უწყობს სურსათის უვნებლობისა და მომხმარებელთა უფლებების საკითხებზე მომუშავე საზოგადოებრივი ორგანიზაციების კვალიფიკაციის ამაღლებას, ახდენს რეფორმების პროცესის მონიტორინგს, აწარმოებს საზოგადოებრივი ინფორმირების კამპანიას სურსათის უვნებლობისა და მომხმარებლის უფლებების საკითხებზე და კოორდინაციას უწევს სამოქალაქო საზოგადოების დიალოგს საქართველოს ხელისუფლებასთან მიმდინარე რეფორმების თაობაზე.

ევროპის ფონდისა და მისი პარტნიორი საზოგადოებრივი ორგანიზაციების ათობით რეკომენდაცია იქნა გათვალისწინებული სურსათის უვნებლობის მარეგულირებელ კანონმდებლობაში, რაზე მუშაობაც ახლაც გრძელდება.

წლების მანძილზე საქართველოში სურსათის უვნებლობისა და მომხმარებლის უფლებების დაცვის კუთხით სახელმწიფო რეგულირება სუსტი იყო. ამჟამად მიმდინარეობს რეფორმები, საქართველოს კანონმდებლობა და კონტროლის მექანიზმები უახლოვდება ევროკავშირის სტანდარტებს. ამასთანავე, მეწარმეებს დამატებითი ტვირთი აწევბათ, რათა საწარმოო პროცესი და პრაქტიკა სრულ შესაბამისობაში მოიყვანონ კანონმდებლობის ახალ მოთხოვნებთან. ამ აუცილებელი რეფორმის წარმატებისათვის მნიშვნელოვანია არა მარტო დამსჯელი სანქციების გატარება კანონდამრღვევი საწარმოების მიმართ, არამედ კანონმორჩილი მეწარმეების წახალისებაც.

ფონდმა 2014 წელს დაიწყო კონკურსის „წლის საუკეთესო სასურსათო საწარმო“ ჩატარება, რომელმაც მასში მონაწილე საწარმოების ერთსულოვანი მოწონება დაიმსახურა. ფონდი აცხადებს რიგით მესამე კონკურსს „2016 წლის საუკეთესო სასურსათო საწარმო“ გამოსავლენად.

კონკურსის შესახებ

კონკურსის ამოცანაა „2016 წლის საუკეთესო სასურსათო საწარმო“ გამოვლენა. ეს წოდება მიენიჭება კონკურსში მონაწილე იმ საწარმოს, რომელიც საუკეთესო შედეგებს აჩვენებს სურსათის უვნებლობისა და ეტიკეტირების მოთხოვნების შესრულების თვალსაზრისით.

კონკურსი მიზნად ისახავს:

- იმ სასურსათო საწარმოების წახალისებას, რომლებიც ასრულებენ სურსათის უვნებლობისა და ეტიკეტირების მოთხოვნებს.
- მომხმარებელთა ინტერესების პატივისცემის წარმატებული მაგალითების პოპულარიზაციას.

ვის შეუძლია განაცხადების წარმოდგენა?

განაცხადების წარმოდგენა შეუძლიათ საქართველოში რეგისტრირებულ საწარმოებს, რომლებიც აწარმოებენ სურსათს, ან ვაჭრობენ სურსათით.

გამარჯვებულის გამოვლენის პროცესი და შეფასების კრიტერიუმები

კონკურსის მონაწილეთა საწარმოო პროცესი და წარმოებული, ან რეალიზებული პროდუქცია უნდა პასუხობდეს საქართველოში მოქმედ უვნებლობისა და ეტიკეტირების მოთხოვნებს. გამარჯვებული გამოვლინდება კონკურსში მონაწილეთა საწარმოო პროცესებისა და მათი პროდუქციის ლაბორატორიული შემოწმების შედეგად.

ფონდი შეარჩევს შესაბამისი კვალიფიკაციის მქონე სპეციალისტებს, რომლებიც საწარმოთა შემოწმებას ჩაატარებენ (3 გაუფრთხილებელი შემოწმება წელიწადში), ხოლო აკრედიტებულ ლაბორატორიებში მოხდება ამ საწარმოთა მიერ გამოშვებული სურსათის შემოწმება (3 სხვადასხვა სასურსათო პროდუქტი წელიწადში). შემოწმების შედეგების

მიხედვით ფონდი საუკეთესო საწარმოს გამოავლენს, იმ საწარმოთა შორის, რომლებიც სურსათის სექტორში მოქმედი საკანონმდებლო მოთხოვნების დაცვით მუშაობენ. შემოწმების შედეგები ხელმისაწვდომი იქნება მხოლოდ მოცემული საწარმოსა და ევროპის ფონდისათვის, გარდა იმ შემთხვევებისა, როცა საქართველოს კანონმდებლობა განსხვავებულ ვალდებულებას აკისრებს პროცესის მონაწილე მხარეებს.

კონკურსის გამარჯვებულს მიენიჭება ევროპის ფონდის მიერ დაწესებული ჯილდო „2016 წლის საუკეთესო სასურსათო საწარმო“. გამარჯვებულის შესახებ ინფორმაციას ევროპის ფონდი აქტიურად გაავრცელებს. გამარჯვებული ასევე გამოცხადდება „ოქროს ბრენდის“ დაჯილდოების ცერემონიაზე. „ოქროს ბრენდის“ ფასიანი ლიცენზიის შექმნის შემთხვევაში გამარჯვებული შეძლებს აქტიურად ისარგებლოს „ოქროს ბრენდის ხარისხის ნიშნით“ მარკეტინგული და სარეკლამო მიზნებისათვის და ასევე მიიღოს სარეკლამო სივრცე ტელევიზიაში, რადიოში, გაზეთსა და ბილბორდებზე. კონკურსში გამარჯვების ფაქტის გახმაურებით მოხდება გამარჯვებული საწარმოს რეკლამირება და გაიზრდება მის მიმართ მომხმარებლის ნდობა.

კონკურსის ყველა მონაწილე, წელიწადში სამჯერ, უსასყიდლოდ მიიღებს რეკომენდაციებს საწარმოო პროცესის ორგანიზების თაობაზე კვალიფიციური ექსპერტის მიერ. გარდა ამისა, საწარმოების მიერ წარმოებული, ან ნავაჭრი სურსათის შერჩეულ ნიმუშებს წელიწადში სამჯერ, უსასყიდლოდ ჩაუტარდებათ ლაბორატორიული შემოწმებები. ყოველივე ეს საშუალებას მისცემს მეწარმეებს უკეთ იყონ მომზადებული სახელმწიფო კონტროლისათვის.

განაცხადების წარდგენის პროცედურები

კონკურსში მონაწილეობის მსურველებმა უნდა შეავსონ თანდართული განაცხადის ფორმა. განაცხადის წარდგენა შესაძლებელია ფონდის ოფისში, ან ელექტრონული ფოსტით, მისამართზე: lberdzuli@epfound.ge წერილის კონვერტზე, ან ელექტრონული გზავნილის საგნის ველში გთხოვთ მიუთითოთ: კონკურსი „2016 წლის საუკეთესო სასურსათო საწარმო“.

განაცხადების წარდგენის ბოლო ვადაა 2016 წლის 23 მაისი.

კონკურსში მონაწილეობის მსურველ საწარმოებთან, რომლებიც კონკურსის პირობებს აკმაყოფილებენ, ფონდი გააფორმებს ხელშეკრულებას თანამშრომლობის თაობაზე.

კონკურსის გამარჯვებულის გამოცხადება იგეგმება 2017 წ. აპრილში.

საკონტაქტო ინფორმაცია

ევროპის ფონდი, თბილისი, კავსაძის 3, მე-2 სართული, ტელ.: 225 39 42/43.

საკონტაქტო პირი: ლელა ბერძული, პროგრამის თანამშემწე, ელფოსტა: lberdzuli@epfound.ge